

# Olimpiades 2026, lumes e ombries

Luigi Casanova e Maria Bosin se à confrontà sui aspec positives e negatives del maor event sportif te Fiem e Fascia

Lumes e ombries su la Olimpiades Milan-Cortina 2026. L'è stat l'argoment de la pruma de la cater scontrèdes endrezèdes da la Comision cultura del Coman de Moena ensema al Cai Sat Grop da Mont, stada en jèbia ai 16 de mèrz te sala de Comun. A confront Luigi Casanova ambientalist, che à metù dant en curt l'contegnù de sie liber «Ombre sulla neve», e Maria Bosin ombolta de Pardac, lech olache sarà la garejèdes de saut e de combinèda nordica, che à rejonà di valores soziai e sportives che porta chest gran event.

**Luigi Casanova: gran opores e strèfias de teritorie**

«La Olimpiades – à dit Luigi Casanova – les è do che les vegn endrezèdes te n acort e na secreteza assoluta, l'è stat l'met de aer informazzions demò dai Comitaz territoriali. Se rejonèdes de n event a cost zero e enzeve no l'è cossita. Te chest moment l'cost pervèdù l'è de 4 miliard e 200 milions. Tel dossier l'era scrit che l'era l'oblig de la Vas (Valutazion Ambientala Strategica) enzeve col commissariament l'è stat dut descancelà. Ne è stat emponù opores che no à nia a che fer coi Jeghes e che l'è n gran sfrelaus de scioldi e de teritorie.»

E chiò no poèda mencià l'ejempie de la pista da bob de Cortina, olache ence chisc di passè l'è stat na manifestazion de contra. Se era pontè via dal cost de 50 milions de euro e ades l'è ruà a passa 100 milions, n impiant che serviss demò per i Jeghes ajache chi che pratega chest sport è dassen pec. «L' Tiroi aea dat sia disponibilita à fer la gares de bob fora Dispruch – à dit Casanova – con n contribut per meter a post la pista e fer a Cortina la premiazion, ma la politica à dit de no.»

E dapò l'è l'aspet de la legacy, de la ritazion che lascia chesta opore: duta cantes, l'è scrit tel dossier, cogn aer vantajes positives sui teritories. «Nos proponon che de contra al sfrelaus del teritorie per la opores – à dit Casanova – per chel che vèrda l' Trentin vegne investì tel parch natural del Lagorai per ge dèr n valor a duta canta la spensa.»

**Maria Bosin: la Olimpiades l'è valores sportives e social**

«Nos pisson che la Olimpiades sie na gran oportunita per nosc teritorie

– à dit la ombolta Maria Bosin – per chest, enceben che no assame abù na persona te Comun che pel ge stèr do, se aon metù a lurèr con gaissa. Per nos l'è stat ence positif poder tor pèrt ai Jeghes con nesc impiant sportives. Un di doi trampolins cogna vegnir refat dutun ajache l'aea problemes de statizità e no l' aessa più ciapà l'autorizzazion. L' saut no l'è zeche de forest per Pardac, la comunità ge cree e l' à investì trop tel temp te chesta disciplina ence se no podarà mai esser n sport per duc.»

Vegnarà refat i trampolins HS109 e HS143 con n lift per portèr su i atlec, na torn per i giudiz e na vasca de regoeta de Fèga per l' impiant per fer neif con na speisa en dut de 36 milions de euro corri da la Provinzia de Trent per 24 milions e dal Departiment per l' Sport del Goern per 12 milions.

N' auter intervent è pervèdù per l' vilaje olimpich che vegnarà fat lo da la scola de la Finanza de Pardac. Chiò vegnarà metù a post i zentres Macchi e Nicolaucich, petà ju e refat da nef l' pavion Latemar e fat su l' nef ciasament Olimpich per na speisa en dut de 27,6 milions de euro che en pèrt vegn corri ence da la Finanza. «L' è positif che sie stat cernù de no fer n vilaje olimpich dut nef ma che vegne desfrutà l' zenter de la Finanza – à dit Bosin – amò de più ajache l' aea de besegn de mioramenc dal pont de veduda static, antisismich e idraulic.»

Semper per chel che vèrda i investimenc te Fiem vegnarà metù a post l' zenter de paslonch de Lago con l' adattament de la pistes, del impiant per fer neif e chel de la lumes, refat la tribunes, fat n nef zenter Fisi e na neva pista de skiroll. N' altra pista de skiroll è pervèduda ence sun Lavazè.

Sul besegn de aer doi pistes da skiroll à domanà spiegazzions Luigi Casanova.

Tant l' ombolta Bosin che l' conseier Pietro Degodenz, prejent te anter l' publich, à spiegi che i atlec no pel se acedèr sun strèda e donca chesta doi pistes, una a 900 metres e l' altra a 1800 metres, è states pissèdes per ge dèr na resposta ai gropes sportives de la val e a chi de la Finanza e de la Polizia.

No demò strutture, ma ence intervenc de viabilità desche l' BRT, l' sistem de coleamenc con corsies riservèdes ai autobus, sun chel che



Luigi Casanova e Maria Bosin a confront su la Olimpiades 2026.

i relatores à abù vèlch dubie per i tempes strenc. Duc doi d'acort che la soluzion mióra per smendrèr l' trafich fossa stat la ferata ma se trata de n'opera massa impegnativa.

## Visibilità e oveturism

Ma la valèdes de Fiem e Fascia èles dalbon besegn de la Olimpiades? El besegn de portèr amò più jent te n teritorie che padesc jà de oveturism? L' è la domanes che è ruèdes dal publich e sun cheles che se à enterogà ence Casanova e Bosin.

Duc d'acort sui aspec negatives de n sci gran numer de jent te la

sajon da d'invèrn. «I impiantisc è jà do che se domana olache troarà post i schiadores che rua endèra i Jeghes – à dit la ombolta. Se spera che da chiò posse nascer vèlch reflexion per portèr de più a na acolienza de calità che de cantità. Aboncont n lech olimpich l' à semper n inom, n rechiam per i turisc che cognarà vegnir desfrutà te la vida mióra per nesc teritories.»

## I numeros

La Olimpiades Milan-Cortina 2026 sarà dai 16 ai 22 de firè, la garejèdes paralimpiches dai 6 ai 15 de mèrz.

L' è pervèdù 16 disciplines olimpiches e 6 paralimpiches te 18 sentes de gara de Milan, Valhellina, Ampez, Fiem e Anterselva, con più che 3500 atlec da passa 90 Pajjes.

Te Fiem vegnarà fat 12 garejèdes de paslonch con la premiazion per la venta de 60 medaes, 6 de saut (con 36 medaes) e 3 de combinèda (con 18 medaes); 21 garejèdes de para cross-country (con 90 medaes) e 21 garejèdes de para biathlon (con 90 medaes).

Per l' Trentin se stima l' besegn de 4.000 posc let.

Monica Cigolla